

կիրառելիս Դավրիժեցին, իհարկե, չանտեսելով այդ նվաճումները, առավել քան այլ առումներով հետևում է 5-րդ դարի պատմագրության, ի մասնավորի՝ Մովսես Խորենացու «Ողբի» ավանդներին: Այսինքն՝ **Ժանրը Դավրիժեցու պատմագրքում կիրառվել-դրսևորվել է իր նախաձևային հատկականություններով:** Անշուշտ, Դավրիժեցու համար ուղենշային են եղել նաև Աստվածաշնչի համապատասխան հատվածները: Դա արտահայտվում է ինչպես պատկերային համակարգում և ճարտասանական հնարքների կիրառության նրբություններում, այլև ու հատկապես լեզվում: Պատահական չէ այն հանգամանքը, որ «Առաքել Դավրիժեցու Պատմության արտահայտիչ ու օտար բառերով մատակարարված լեզուն», երբ «շատ հազվադեպ իր տեղը զիջում է վերամբարձ ոճի և **դասական** գրաբարի»³⁸ (ընդգծումը մերն է-Ա.Ն.), ապա հատկապես այն դեպքերում, երբ պատմիչը դիմում է ողբի ժանրային յուրահատկություններին ու հնարավորություններին և ներկայացնում իր ժողովրդին պատուհասած աղետներն ու արհավիրքները:

Հենրիկ Բախչինյանն էլ է իր հերթին գրում, որ «Նման հատվածներով Դավրիժեցին վերածնել է V դարի հայ պատմագրության հայրենասիրական ոգին ու գեղեցիկ, զգացմունքային պատումը»³⁹: Խնդիրն առավել խորքային պլանով է դիտարկում Զավեն Ավետիսյանը. «Պատմության այս շրջանը (17-18-րդ դարերը-Ա.Ն.) նույնպես լի է բազում դրամատիկ ու ողբերգական իրադարձություններով, որոնց հետևանքների անմիջական կրողներն առաջին հերթին հայ պատմիչներն են, և այս ամենը գրի առնելիս միշտ օգնության է գալիս Պատմահոր փորձը: Նման դեպքերում հատկապես գործուն կիրառություն են գտնում ողբի ժանրային ձևերը, որոնք հիմնականում գալիս են Խորենացու պատմությունից»⁴⁰:

³⁸ **Առաքել Դավրիժեցի**, Գիրք պատմութեանց, տե՛ս «Առաջաբանը», էջ 40:

³⁹ **Հենրիկ Բախչինյան**, XVII-XVIII դարերի հայ գրականությունը, էջ 120:

⁴⁰ **Զավեն Ավետիսյան**, Խորենացին մշակույթի գիտակցության մեջ, էջ 15: